

e in la Boiana, et fo bandito tutti quelli venivano de li.

Noto. Hozì fo portato in Pescaria uno pesse trovato in mar da pescatori, quasi mostro, era grande

.....
In questa matina, in una scuola a san Lio di maestro Stephanin optimo gramatico, uno fiol di sier Zorzi Venier, chiamato sier Francesco, di età di anni fece una oratione et lexè una epistola di Cicerone, *videlicet* la prima familiar, et per 12 soi condiscipoli li fo arguito, et lui li rispose, et poi datoli una epistola vulgar e lui la fè latina, *videlicet* cadauno variamente, che fo bel udir, et tra li quel che arguite fo uno fiol di sier Vincenzo Donado, uno di sier Hironimo da cha' Taiapiera dottor, uno di sier Bernardo Donado, uno Parleon, uno Zucato, et altri; poi uno fio di sier Marco Trun qu. sier Maffio disse alcuni versi in sua laude. Erano molti zentilomini parenti dil prefato Venier, tra li qual io Marin Sanudo perchè l'è fio de uno fiol di mia sorella, ch'è viva. Et con laude grande si portoe.

In questo Pregadi, ozi fu posto per li Consieri, hessendo stà electo da li parochiani piovàn di santi Ermacora et Fortunato pre' Alvise Zio prete titolato in ditta chiesia, in loco di pre' Francesco Corner è morto, sia mandà a dir al Legato lo confermi, iusta il consueto. 174, 0, 1.

104 Fu posto, per li Savii ai ordeni, confinar sier Alexandro Contarini electo capitano di le galie in Barbaria in galia a di 18 di l'istante, et debbi partir zorni do dapoi, e *successive* do zorni la seconda galia et 2 altri zorni la terza galia, soto pena di la leze, da esser scosa per cadaun di Collegio senza altro Consejo. E perchè forono l'altro viazo cagate molte robe su le galie, quale ritornorono indrio, et volendo li mercadanti quelle rimandar al viazo, pertanto sia preso che le ditte robe, di le qual una volta hanno pagà il dazio, possano *iterum* trazerle senza altro dazio. 163, 2, 6.

Fu posto, per li Consieri e Savii, atento le lettere di sier Domenego Pizamano conte a Trau, e di oratori di quella comunità che hanno exposito l'incendio seguito al castello di domino Paulo Cipico e il brusar di molte caxe di quelli contadini, pertanto sia mandà al nostro Proveditor in Dalmatia bolzoni do di larese, maieri vechi 25 per far il ponte del castello, et per le caxe a doverle refar, tavole di la sorta di Puia 1000, piane, 100, chiodi di 25, 5 milia et altri chiodi numero 500, et ducati 100 la mità in megii et l'altra mità in sorgi, et ducati 25 contadi, da esser dispensadi li danari et robe per quel

nostro Proveditor a quelli subditi, *ut in parte*. Ave: 157, 4, 0.

Fu posto, per li Consieri, atento le lettere dil podestà di Brexa sier Antonio Sanudo di uno caxo horendo seguito de li, di esser stà amazà di notte domino Hironimo Capitola citadin di Brexa dormendo sotto uno portego nel territorio di Leno, però sia preso che *publice* sia a Brexa proclamà, chi quelli acuserà habbino lire 600 di taia di soi beni, si non di danari di Zuan Battista e Antonio di Capitoli so nepoti et heriedi, sicome si hanno oferto; et se uno acuserà, *dummodo* non sia stà il principal, sia assolto, etc. Fu presa Ave: 112, 3, 4.

Noto. A di 7 di l'istante, per sier Daniel Renier e sier Gasparo Malipiero inquisitori del principe Grimani defuncto, et il terzo sier Marco Antonio Loredan è morto, sententiono per più sententie, la sua heredità in ducati 1300 in zerca, *videlicet* per danari intacadi di la sovenzion dil ducato. *Item*, per contrafazion di haver tenuto manco fameglia, et altro.

Copia di capitolo di lettere, di sier Nicolò 104*

Justinian bailo e capitano a Napoli di Romania, date a di 13 Marzo 1524, dritate a sier Marco da Molin procurator suo cugnato, et recepute a di 9 April.

A di 12 di l'istante da sera, zonse la gali, a soracomito missier Vincenzo Salamon, partì de Candia a li 5, et è venuto iudicando trovar missier Piero Zen ambassador, e vol tornar in Candia da matina, perchè hozi el tuò el pan. Referisse, haver comandamento da quel rezimento de ritornar per acompagnar il maran dil Prioli, qual è li venuto d'Alexandria carco di specie et molto rico, sopra il qual la magnificentia vostra e li maistri di Bernardo mio fio dieno haver specie. Et sicome ditto Bernardo scrive et il Soracomito afferma a ditta galla non li denno pratica, perchè in Candia è il morbo, in el qual loco sono stati gran terremoti per quello diconò. Ho scritto al magnifico Proveditor di l'armada per questo navilio, et avisato de ditto maran, et confortatolo lo insontri, over mandì galie. Da poi scritta, sono stato a marina et ho parlato al Sopracomito, il qual mi ha ditto il maran dil Prioli l'aspetta in Candia et che doman si partirà per andar acompagnar; el qual vien de Alexandria et è molto rico, e dice haver scorso gran pericolo e che l'è stato gran fortuna; dice *etiam* in Candia esser stà gran terremoti. Al portador di la presente ho dato un poco